



WAKIL pelajar dari UPM, Fadhliyah Saipul menerima sijil penyertaan yang disampaikan oleh Nasir Sakaran pada majlis penutup Program Perdana Maskum di Kampung Pokas, Semporna.

NASIR Sakaran (tengah) memotong riben pada majlis pelancaran pelepasan payao atau unjam laut dalam di Pulau Mabul sempena Program Perdana Maskum sambil disaksikan oleh sebahagian penduduk dan mahasiswa di Semporna, Sabah, baru-baru ini.

Program anjuran Maskum tingkat sosioekonomi penduduk tiga kawasan

Khidmat bakti siswa di Semporna

Oleh **HISYAMUDDIN AYUB**
 utusansabah@utusan.com.my
 29 Nov 2011 30

SEMPORNA 28 Nov. - Usaha mentransformasi sesebuah negara untuk menjadi sebuah negara maju tidak akan lengkap jika perancangan tersebut tidak memberi tumpuan kepada kawasan luar bandar.

Meskipun begitu, usaha membangun kawasan luar bandar bukannya satu proses mudah yang boleh dilaksanakan sekilip mata kerana ia melibatkan pembangunan fizikal dan persekitaran, selain berhadapan dengan pelbagai kerenah yang tidak dijangkakan.

Namun, dengan komitmen kerajaan yang berterusan, pembangunan luar bandar mampu digerakkan dengan sebaiknya apabila ia mendapat sokongan dan dokongan sepenuhnya daripada semua pihak, termasuk masyarakat setempat.

Menteri di Jabatan Ketua Menteri, Datuk Seri Nasir Tun Sakaran berkata, sumbangan daripada semua pihak termasuk institusi pengajian tinggi awam (IPTA) dan swasta (IPTS) dalam membantu kerajaan negeri meningkatkan pendapatan masyarakat luar bandar adalah satu sumbangan besar.

Katanya, kerjasama pintar antara IPTA dan IPTS bersama masyarakat setempat merupakan satu langkah terbaik kerana ia bukan sahaja memberi faedah besar kepada orang ramai, tetapi dalam masa sama mampu mendidik mahasiswa untuk mengenali kehidupan sebenar golongan luar bandar.

Menurutnya, khidmat bakti diberikan oleh mahasiswa akan membantu golongan yang tinggal di luar bandar memperoleh manfaat daripada ilmu yang dituntut oleh me-



SEBAHAGIAN kakitangan Maskum dan pemimpin tempatan bergambar kenangan dengan Nasir Sakaran di Pulau Mabul, Semporna.

reka di menara gading.

"Ia merupakan salah satu bentuk sumbangan sosial yang boleh diberikan oleh pihak universiti dalam memacu taraf sosioekonomi masyarakat luar bandar, selain memberi peluang kepada mahasiswa untuk merasai sendiri kehidupan di luar bandar," katanya di sini, baru-baru ini.

Beliau berkata demikian ketika berucap pada Program Perdana Maj-

lis Sukarelawan Universiti-Universiti Malaysia (Maskum) yang menabur bakti di Pulau Mabul, Pulau Bum-Bum dan Kampung Pokas, dekat sini.

Hadir sama, Timbalan Naib Canselor (TNC) Hal Ehwah Pelajar Universiti Malaysia Sabah (UMS), Prof. Madya Datuk Dr. Kasim Mansur dan Pengerusi Maskum, Prof. Dr. Wan Mahzom Ahmad Shah.

Program empat hari anjuran Mas-

kum di Semporna tersebut telah membolehkan mahasiswa bekerjasama dengan masyarakat setempat untuk membina unjam ikan yang dinamakan 'payao' bersama kumpulan nelayan di Pulau Mabul dan menyiapkan sangkar ikan di Pulau Bum-Bum.

Mengulas lanjut, Nasir berkata, penglibatan masyarakat setempat dengan 'Penglibatan Komuniti' anjuran pihak universiti boleh me-

ningkatkan taraf sosioekonomi masyarakat.

Jelasnya, ilmu pengetahuan yang dimiliki oleh mahasiswa dapat dikongsi dengan masyarakat setempat supaya mereka tidak lagi hanya bergantung kepada kemahiran yang diwarisi daripada nenek moyang mereka.

Tambahnya, kemajuan teknologi yang rancak berkembang dan kajian berterusan dilakukan oleh

pihak universiti telah menemui pelbagai penemuan teknologi terbaru yang boleh meningkatkan nilai produk.

"Teori dan kemahiran terkini yang lebih saintifik dapat dikongsi bersama dengan golongan nelayan di pulau ini, sekali gus membantu mereka menambah pendapatan yang lebih baik dan tidak bergantung kepada teknik penangkapan ikan secara tradisional," katanya.